

四庫全書

子部

欽定四庫全書

子部

藝林彙考飲食篇卷

五至七

詳校官中書臣王鵬

員外郎臣牛檢文覆勘

總校官編修臣王燕緒

校對官中書臣王鍾泰

謄錄監生臣崔鶴五

欽定四庫全書

藝林彙考飲食篇卷五

蓬萊縣知縣沈自南撰

酒醴類上

古今攷周禮酒正掌酒之政令以式法授酒材注云式
法作酒之法式作酒既有米麴之數又有功沽之巧

疏云

功沽謂月令曰乃命大酋秫稻必齊麴蘖必時湛餱必

善惡

潔水泉必香陶器必良火齊必得鄭司農云授酒材授

酒人以其材沽

古

秫

述

湛

接廉反

饎

昌志反

○紫陽方氏曰

今月令饎作熾注炊也湛漬也大酋者掌酒之官於周則為酒人未知大酋何代酒官古者獲稻而漬米麴至春而為酒詩云十月獲稻為此春酒回謂十月十一月造酒之時明年春筍酒榨酒蒸炊酒之時酒正天子之一官也酒人則六鄉六遂各有之乎酒正授酒材酒人授之以飲鄉故曰公酒

丹鉛錄大酋酒官之長月令大酋監之說文酋繹酒也

酋音窮南中夷人有酋長羣夷有酒必先酌之謂之把酒亦猶中國之祭酒也

庶物異名疏月令注酒熟曰酋周禮注酋昔酒鄭云昔酒今之酋久白酒所謂舊醖者也吾鄉白酒之勁者釀家每譽之曰是愁久者即此酋字也

留青曰札先酒始為酒者古人飲必祭故有祭酒老者舉酒祭地也柳子厚詩舉觴酌先酒

酒譜世言酒之所自者其說有三其一曰儀狄始作酒

與禹同時又曰堯酒千鍾則酒作於堯非禹之世也其二曰神農本草著酒之性味黃帝內經亦言酒之致病則非始於儀狄也其三曰天有酒星酒之作也其與天地並矣予謂是三者皆不足據夫儀狄之名不見於經而獨出於世本世本非信書也其言曰儀狄始作酒醪以變五味少康始作秫酒其後趙邠卿之徒遂曰儀狄作酒禹飲而甘之遂絕旨酒而疎儀狄曰後世其有以酒敗國者乎夫禹之勤儉固嘗惡旨酒而樂讜言附之

以前所云則贅矣或者又曰非儀狄也乃杜康也魏武帝樂府亦曰何以消憂惟有杜康予謂杜氏本出於劉累在商為豕韋氏武王封之於杜傳國至杜伯為宣王所誅子孫奔晉遂有杜為氏者士會亦其後也或者康以善釀得名於世乎是未可知也謂酒始於康非也堯酒千鍾其言本出於孔叢子蓋委巷之說孔文舉遂徵之以責曹公固已不取矣本草雖傳自炎帝氏亦有近世之物始附見者不觀其辨藥所生出皆以二漢郡國

名其地則知不必皆炎帝之書也內經言天地生育五材休王人之壽夭繫焉信三墳之書也然考其文章知卒成是書者六國秦漢之際也故言酒不據以為炎帝之始造也酒三星在女御之側後世為天官者或者焉予謂星麗乎天雖自混元之判則有之然事作乎下而應乎上推其驗於某星此隨世之變而著之也如宦者墳墓弧矢河鼓皆太古所無而先有是星推之可以知其類然則酒果誰始乎予謂智者作之天下後世循之

而莫能廢故聖人不絕人之所同好用於郊廟享燕以
為禮之常亦安知其始於誰乎古者食飲必祭先酒亦
未嘗言所祭者為誰茲可見矣夏書述大禹之戒歌辭
曰甘酒嗜音孟子曰禹惡旨酒而好善言夏書所記當
時之事孟子所言追道在昔之事聖賢之書言可信者
無先於此雖然酒未必此始造也

酒譜天漢三年初榷酒酤元始五年官賣酒每升四錢
酒價始此

演繁露王莽時酒一釀用麴米二斛麴一斛得成酒六
斛六斗今按此文見食貨志此酤賣之齊也用此數計之米麴通
用三斛取酒三斛不啻也故漢世通米酒計之其米多
而酒少者為上尊也

丹鉛錄所謂當釭蓋治酒也今燒酒法云起自文君唐

詩卓女燒春醴是也燒春名亦佳

顧有孝曰釭按史記作釭韋昭曰釭酒肆

也以土為墮邊高似釭漢書食貨志司馬相如傳俱作
盧如淳曰酒家開肆待客設酒釭故以釭名肆臣瓚曰
盧酒甑也師古曰賣酒之處累土為盧以居酒甑四邊
隆起其一面高形如鍛盧故名盧耳而俗之學者皆謂

當盧為對溫酒
火爐失其義矣

丹鉛錄麴酒母也釋名麴朽也鬱之使生衣朽敗也丘
上聲今燕趙之音正叶

宛委餘編麴酒母也一曰酒教也揚雄方言麴音器自關

而西秦幽之間曰麴音年大麥麴也晉之舊都呼麴為

麴音才麴音滑于齊右河濟曰麴音果麴音小麥麴北燕曰麴

麴又麴音卑細麥麴也音蒙有衣麴也今天下通呼麴不

聞有此數名

名義考說文麴酒母也徐氏曰麴蘖也酒主於麴故曰
酒母玉篇梅麴酒母孟康曰媒酒醱蘖麴也周禮媒人
注齊人名麴麴曰媒說文玉篇媒人注訓麴已明徐氏
訓麴并及蘖孟康所訓俱失之蓋麴今麴餅蘖今麥芽
為飭者故書注曰麴多則太苦蘖多則太甘今人止用
麴不復用蘖矣然麴亦麥所成者酒醱酒滓也麴蘖以
釀酒故釀成其罪者曰媒蘖

梅音枚
醱音教

丹鉛錄醕首酒也今曰頭酒醕尾酒也

酒爾雅醖酒母也釀酒本也醖重醖酒也酎醖酒也醕
未泚之酒也醕汁滓酒也醕厚酒也醕薄酒也醕一宿
酒也醖酒微清而濁也黃封官酒也醕清酒也醕清而
甜也醕音盞濁酒也醕音展苦酒也醕紅酒也醕綠酒也醕
白酒也玄鬯醇酒也上尊糯米酒也中尊稷米酒也下
尊粟米酒也玄酒明水也四酎四重釀也三友者樂天
以詩酒琴為三友今人指三友為酒昔同之訛也燭蟲
乾酪也

兩鈔摘腴醕酢醕導飲也欲以醕賓而先自飲以導之此飲觴之初自飲訖進酒于賓乃謂之醕酢報也賓既卒爵洗而酌主人也

留青日札禮者不脫履而即序也宴者跣而上坐也又賈逵曰不脫履升堂曰醕一曰飫酌盛酒行觴也酌少飲也酬獻主人進客酢客酌主人也配相飲也醕報也醕一作醕能者飲之不能者已也釀合錢共飲也醕賜民共飲也醕飲盡也酌以酒漱口食畢以酒演養其氣

也醺獨酌而醉也攝飲持酒往飲也浮相強也崇飲過也痛飲虐也轟飲狂也渴飲若口燥而欲飲也酣耽樂也沈者齊顏色均衆寡又曰過飲湛溺也洒者閉門不出又曰顏色齊同故作酺也酺酺酺皆醉甚也鯨飲海吞也泥飲爛醉也獵酒索飲也日飲漢書日日飲也食酒漢書能多飲費盡也婪尾藍尾末飲也陽醉詐也霑醉深也被酒帶醉也中酒傷而惡也使酒酺亂也清酣不飲而心醉也曩不醉而怒也白著宋人言酒酣也

營榮也。允酒甚亂。小人飲酒一醉日富。亦因酒為榮也。
醒病酒也。

留青日札。白酒曰醴。一作酇。又名醲。白居易詩。白酒善
消愁。蘇子云。白酒無聲滑。瀉油濁酒。嵇康云。濁酒一杯。
杜少陵云。牆頭過濁醪。黑酒醉鄉。日月謂之愚酒。色黑
而酸醲者也。苦酒。韓子蒼詩云。飲慣茅柴。諳苦硬。不知
如蜜。有香醪。蘇子瞻云。白酒微帶荷心苦。又云。松明酒。
方言。苦快也。一作禽。酇。酇皆苦味也。又魏名臣傳。酇名。

苦酒醪酒曰醪味醪醖也蘇詩杜酒粥面醪歐詩綠醪
寒更醪淡酒曰醪味薄也萬畢術注斷蒲漬酒中即厚
凍漿酒凡酒過熱則酸過冷則凍古亦名凍醪魏都賦
云凍醪流澌溫酎躍波

名義考酒酉也以米麴酉醪為義黍所成者醴體也以
汁滓相埒為義稌所成者稌即稻稻即稌音懦詩多黍多

稌為酒為醴食音嗣飯也以炊穀為義稷所成者詩曰我
藝黍稷以為酒食又曰黍稷彧彧以為酒食古人以黍

稷百穀之長故祭祀用焉稌則洽百禮不用裸獻矣

音解

亦稌

音杜

名義考縮酒茜酒

茜音縮

郊特牲縮酌用茅注縮沛也說

文禮祭束茅加於裸圭而灌鬯酒是為茜沛與霽同蓋醴齊濁以茅藉滓霽出其汁詩釃酒有藇藇香草亦猶茅也曰縮者去滓若縮斂之耳束茅立之祭前沃酒其上酒滲下若神飲之士虞禮束茅五寸謂之苴者此也曰茜者从艸酉會意周禮甸師共蕭茅鄭大夫云蕭字

或為苽苽讀為縮左傳包茅不入無以縮酒注謂束茅而灌之以酒為縮皆混釋也

丹鉛錄籩人職曰朝事之籩其實粢黃鄭云熬麥也楊倞諒云麥之牙蘖也至脆弱音與豐同按粢从豐與醴酒之豐義同荀子富國午其軍取其將若撥粢言薄弱也說文从豐恐非

古今攷漿人掌共王之六飲水漿醴涼醫

賁疏云謂醴粥為醴乃為

醫配入于酒府共賓客之稍禮共夫人致飲于賓客之

禮清醴醫酏糟而奉之凡飲共之鄭注王之六飲亦酒
正當奉之醴醴清也鄭司農云涼以水和酒也玄謂涼
今寒粥若糗飯雜水也酒正不辨水涼者無厚薄之齊
○鶴山先生曰醫計於美於反今當從醫古注釋文正義皆
相承作醫後鄭從酒鄭此三字恐當作酒正二字注失醫之失字從
毆從酉省也疑先鄭已誤矣

丹鉛錄酒正辨四飲之物二曰醫醫音倚音倚或作醴音和
醴酏為飲也鄭司農說內則漿水醴音俱相近文字不

同記者各異耳

丹鉛錄淮南子東風至而酒湛湓李淳風感應經湛作
汎其解云按今酒初熟甕上澄清時恒隨日轉在旦則
清者在東畔午時在南日落在西夜半在子恒隨日所
在也又春夏間在地窖下停春酒在甕上汎者皆逐風
而移雖居深密非風所至而感召動之

丹鉛錄酒一作子與切考經緯曰酒者乳也嘉穀之乳
也張超誚青衣賦東向長跽接狎歡酒悉請諸靈辟邪

無主參同契法象歌若藥染為黃似藍成綠組皮革煮成膠麴蘖化為酒

丹鉛錄說文漿酢也周禮四飲之物三曰漿石氏星經酒醪五齊之屬天文酒旗星主之漿水六清之屬天文天乳星主之內則所謂酒漿當有別也○酢古音醋言其有酸味也本草玉石下品部漿水味甘酸微溫無毒主調中引氣宣和強力通關開胃調理腑臟粟米新熟白花者佳煎令醋止嘔噦白人膚體如繒帛為其常用

故人不齒其功○按楚辭招魂臠鼈炮羔有柘漿些漢書泰尊柘漿唐宴進士有三勒漿謂訶梨勒庵摩勒烏攬勒也則漿不止用粟米爾

湘烟錄鄭畋三勒漿詩卉醴阨花物外香清濃標格勝椒漿註仙經呼蜜為卉醴

古今攷周禮天官酒正辨五齊

才細反

三酒註云泛

芳劔反

齊泛者成而滓浮泛泛然如今宜成醪矣醴齊醴猶醴

也成而汁滓相將如今恬酒矣盎

烏浪反

齊盎猶翁也

翁鳴動反

一音於勇反

成而翁翁然葱白色如今酇白矣

酇宜作醪醪才何反

音體齊緹者成而紅赤如今下酒矣沈齊沈者成而滓沉

如今造清矣自醴以上尤濁縮酌者盎以下差清其象

類則然古之法式未可盡聞杜子春讀齊曰粢又禮器

曰醴酒之用玄酒之尚玄謂齊者每有祭祀凡以度量

節作之事酒鄭司農云有事而飲也玄謂事酒酌有事

者之酒其酒則今之醪酒也醪音亦

徐音昔

昔酒司農云

無事而飲也玄謂今之酋久白酒所謂舊醪者也清酒

司農云祭祀之酒玄謂今中山冬釀接夏而成○正義
曰五齊皆言成者謂酒熟曰成云如今宜成醪者宜成
說以為地名故曹植酒賦曰宜成醴醪蒼梧縹清若馬
融所云今之宜成會稽稻米清似宜成以為酒名故劉
杳要雅亦以宜成為酒名二者未知孰是今鄭云宜成
醪矣未知鄭意酒名地名類下酇白則為蕭何所封南
陽地名下酒謂糟床下酒其色紅赤故以縹名之按鄭
下注五伯縹衣亦赤黑色也漢時造清熟則滓沈故以

況沈齊也。自醴以上尤濁。縮酌者以茅縮酌。謂以茅汴之故。司尊彝云醴齊縮酌。盎以下差清清。不用茅。故云盎齊。況啐酌。況清也。五者皆舉漢法。況文昔酒對事酒。為清。若對清酒則為白。故曰酋。久白酒也。酒敦曰酋。酋者久遠之稱。故月令名酒官為大酋。於周禮則為酒人。中山郡名。故魏都賦云醇酎。山中沈湎千日。○紫陽方氏曰。周之五齊三酒。漢近古猶可引類。方比如今恬酒之恬。恐只是甜字韻書注。甜甘也。美也。楚元王交傳。穆

生設醴注醴甘酒也少麴多米一宿而熟不齊之則漢之醴酒與周之醴齊已自不同似乎後世五齊三酒之法皆不可攷今之煮酒實則蒸泥之季冬者佳曰清酒則未蒸者用清水白麴麴曰白酒用諸藥蓼汁為麴易成曰茅柴酒曰紅酒釀米為紅麴記得蜀人有醪子酒小瓶傾少許以湯和飲今之造酒其米曰秫曰糯月令秫稻必齊是也粟有糯亦可釀而古五齊皆用秬黍則三酒亦然秬黍之中又以一掬二米者為鬯酒在月令

始云秫稻又謂之穀粟之黏者酒以地名則如烏程若
下之類宜成或非地名或任意誇酒美名近世思堂春
高廟之堂也玉練搗美之如玉也羊羔白如其色也靜
江府酒尤佳

名義考記曰鬱合毫臭先儒謂擣鬱金香草之汁和合
毫酒按本草鬱金無定識嘗考達磨俱舍論鬱金樹名
出罽賓國花黃色壓汁為香竊恐周以前罽賓未通中
國先王不寶遠物亦何取鬱金也蓋鬱非草乃草之春

築猶鬯非酒乃酒之條達說文鬱作鬱芳草也十葉為
貫百廿貫築以煮之為鬱故其字从臼从缶又曰百草
之華遠方鬱人所貢則鬱乃合衆香草春築之故曰鬱
鬱人亦以是得名以是鬱和酒其氣條達故曰鬯衆香
草薰蘭蕭艾之屬皆備也故曰百草之華王度記天子
以鬯諸侯以薰大夫以蘭芝士以蕭庶人以艾諸侯以
下各一物天子備物耳禮記釋鬱鬯誤引鬱金本草釋
鬱金誤引鬱鬯於是交亂矣埤雅釋草至以鬯亦為草

名非甚

疑耀古者釀酒以黑黍為上其色必黑祭祀用鬱草和之者以鬱草黃色故酒色黃而且香詩所謂黃流在中以其酒色黃而且流動也今又乃以黃色為酒品之惡者與古異矣又絕無以鬱草和酒豈其法不傳耶若酒之不和以鬱者又名為𦵏是黑黍之酒即𦵏也若加以鬱乃名鬱耳說文解𦵏字乃云以秬釀鬱草是𦵏亦可以兼鬱自鬱與𦵏對言之則當致其辭耳

演繁露漢八月飲酎說者曰酎正月釀八月成許叔重
曰八月黍成可為酎酒酎三重醇酒也二說不同然酒
固有久醕者恐八月易月乃成期太迂遠當以黍成可釀
為是黍既登熟三重釀之八月一月可辨也

天中記漢制宗廟八月飲酎用九醕太牢皇帝侍祠以
正月旦作酒八月成名曰酎一曰九醕一名醇酎張晏
曰正月旦作酒八月成名曰酎酎之言純也師古曰酎
三重釀醇酒味厚故以薦宗廟

詩名物疏周禮五齊之名二曰醴齊注醴猶體也成而汁滓相將如今甜酒矣韓詩說醴甜而不滓也說文酒一宿熟也孔疏云醴不可專飲天子於羣臣不徒設醴而已左傳天子饗諸侯每言饗醴命之宥是饗醴者天子飲酒之敬故舉醴言之

辨物志明堂位云殷尚醴周尚酒酒醴一也而殷周異尚何醴甘酒也少麴多米一宿而熟蓋儀狄始造酒殷去夏近九醞之方未備故用醴者薦時尚也周禮漿人

酒正酒法大備故周用酒者崇時物也

余氏辨林魯元王為穆生設醴酒後醴酒不設穆生去
皆謂醴酒醇酒也夫醇酒亦易辨之物何設不設關賢
士之去留考說文一宿熟曰醴夫為一人而日勞醞釀
其敬可知不設則敬衰故去

史通注莊子魯酒薄而邯鄲圍郭象注楚宣王朝諸侯
魯恭公後至而酒薄宣王怒欲辱之恭公不受命宣王
乃發兵與齊攻魯梁惠王常欲擊趙而畏楚救趙楚以

魯為事故梁得園邯鄲言事相由也又淮南子魯酒薄而邯鄲園許慎注楚會諸侯魯趙俱獻酒於楚王魯酒薄而趙酒厚或易魯薄酒奏之楚王以趙酒薄故園邯鄲也二注不同

說畧今人名醞之漓薄者為魯酒則以為出莊子魯酒薄而邯鄲園之義不知其所謂蓋古也昔者魯人不能為酒惟中山之人善釀酒之美者醉人至十日焉魯人求其方不得有仕於中山者至酒家取其糟歸以魯水

清之謂人曰中山之酒也魯人飲之皆信一日中山之
酒主來聞有酒索而飲之吐而笑曰斯子之糟液也奚
其酒

道山清話朱康叔送酒與子瞻子瞻以簡謝之云酒甚
佳必是故人特遣下廳也蓋俗謂主者自飲之酒為不
出庫耳

野客叢書徐彭年家範其子問人稱酒為青州從事謂
何曰湘江野錄云昔青州從事善造酒故云僕考世說

與此說不同桓公有主簿善別酒好者謂青州從事惡者謂平原督郵蓋青州有齊郡平原有鬲縣言好酒下齊而惡酒在膈上住也從事美官而督郵賤職故取以為喻

五雜俎青州從事向擅聲稱今所傳者色味殊劣不勝平原督郵也然從事之名因青州有齊郡借以為名耳今遂以青州酒當之恐非作者本意

老學庵筆記晉人所謂見何次道令人欲傾家釀猶云

欲傾竭家貲以釀酒飲之也故魯直云欲傾家以繼酌
韓文公借以作簞詩云有賣直欲傾家貲王平父謝先
大父贈簞詩亦云傾家何計效韓公皆得晉人本意至
朱行中舍人有句云相逢盡欲傾家釀久客誰能散橐
金用家釀對橐金非也

閒耕餘錄水經注劉墮宿擅工釀採挹河流醞成芳酎
別調氛氲自成馨逸酒稱別調從古未聞

西溪叢話酒謂之歡伯焦貢易林坎之兌遯之未濟辭

云酒為歡伯除憂來樂福喜入門與君相索伯音博協
音也王琪君玉金陵飲酒詩云蜀江雪浪來天際一派
泉春寶釵碎蓋謂水碓舂金釵糯也金釵乃糯米之名
詩載荊公集中非是

閒耕餘錄酒能銷憂故曰歡伯亦能亂性故曰禍泉
丹鉛錄孝經緯曰酒者乳也梁張率對酒詩如花良可
貴似乳更堪珍杜子美詩山城乳酒下青雲本此○酒
乳也所以養老壽也天有酒旗星垣在柳乳忍九切

林下偶談飲酒謂之食酒于定國傳定國食酒至數石
不亂如淳曰食酒猶言喜酒師古曰若依如氏之說食
字當音嗜此說非也食酒者謂能多飲費盡其酒猶云
食言焉今流俗書輒改食字作飲字失其真也然食酒
至數石不亂可謂善飲古今所罕有也柳子厚序飲亦
云吾病瘡不能食酒至是醉焉

娛書堂詩話東坡謂晨飲為澆書李黃門謂午睡為攤
飯陸務觀嘗有絕句云澆書滿挹浮蛆翁翁 翁攤飯橫

眠夢蝶牀莫笑山翁見機晚也勝朝侍一生忙

古今攷儀禮鄭注醕猶飲也既食之而又飲之所以樂

之

今按此少牢饋食禮註文醕猶飲也飲字當作羹賈公彥疏云羹者取饒羹之義故以為樂之也特牲饋

食禮云主人洗角升酌醕尸鄭註云猶行也尸既卒食又却順行養樂之士昏禮云酌醕主人鄭註云醕澣也

醕之言演也安也澣所以潔口且演安其所食賈公彥云三註不同者文有詳畧相兼耳具士虞亦是醕尸註

直云醕安食也不言養樂及羹者喪故畧之醕音盾又士刀反鄭云古文醕作酌悅刀反韻書

注澣也續酒也似乎食禮之三飲噉其口也而此似乎

噉賓之口實飲之酒也

雋言叙傳皆引滿舉白談笑

古笑字

大噓

其畧反

服虔曰舉

滿括有餘白瀝者罰之也孟康曰舉白見驗飲酒盡不也師古曰謂飲取滿觴而飲飲訖舉觴告曰盡不也一說白者罰爵之名也飲酒不盡者則以此爵罰之魏文侯與大夫飲酒令曰不酹者浮以大白於是公乘不仁舉白浮君是也

侯鯖錄金陵人謂中酒曰酒惡則知李後主詩云酒惡時拈花藥嗅用鄉人語也

讀史訂疑中酒二字始見於徐邈傳中聖人義如中著
之中而音反從平聲樊噲傳項羽既饗軍士中酒顏注
云飲酒之中也不醉不醒故謂之中義宜從平聲而音
乃竹仲切何也亦猶中興之中音同竹仲耶按中酒二
字來歷之古無如噲傳而義乃別取不為後人語柄余
故標而出之

丹鉛錄酩酊醉貌晉山簡傳及世說皆作茗芋蓋假借
字也又簡文帝曰劉尹茗竹有實理茗竹亦茗芋也今

本一作茗柯於義不貫

○焦竑曰按晉書作醕酏此云茗半誤

鶴山雅言周禮膳夫掌王之食飲饗羞以養王及后世
子讀六經只當用古禮看古無飲酒禮只有鄉飲酒獻
酬之外飲無算其他飲止有醕古者執醬而饋執爵而
醕醕謂漱也又師古云盪口也古人無飲一盪過一
品食之事只是連飲薦脯醢而已若用食禮燕客只食
末後用酒嗽口名醕顏師古注醕謂盪口又曲禮主人
未辯客不虛口注虛口謂醕也音屑又士覲切漱口也

以酒曰醕以水曰漱

鶴山雅言詩有酒糝我無酒沽我毛謂一宿酒曰沽鄭
謂沽酒非三代無沽酒者沽酒市脯亦謂一宿酒康成
直謂權酤之沽失經意

藝林彙考飲食篇卷五

欽定四庫全書

藝林彙考飲食篇卷六

蓬萊縣知縣沈自南撰

酒醴類下

酒譜西京雜記有漂玉酒而不著其說枚乘賦云尊盈
漂玉之酒爵獻金漿之醪注云梁人作落蔗酒名金漿
不釋漂玉之義然此賦亦非乘之辭後人假附之耳興
地志云村人取若下水以釀而極美故世傳若下酒

按吳

錄長城有若溪南曰上若北曰下若
村人取若下水釀酒醇美勝雲陽
張協作七命云荆

南烏程豫章竹葉烏程於九州屬揚州而言荊州未詳

今按烏程有二俱有名酒非專指吳興也吳地理志云
吳興烏程縣酒有名又盛弘之荊州記云淶水出豫章
康樂縣其間烏程鄉有酒官取水為酒酒極
甘美與湘東鄴湖酒年常獻之世稱鄴淶酒
西漢尤重

上尊酒以賜近臣注云糯米為上尊稷為中尊粟為下

尊顏籀曰此說非是酒以醇醴乃分上中下之名非因

米也稷粟同物而分為二大繆矣抱朴子所謂玄菰者

醇酒也

藝苑雌黃張景陽七命云乃有荆南烏程豫北竹葉說者以荆南為荊州然烏程縣今在湖州與荊州相去甚遠惟長興縣南五十步有箬溪夾溪悉生箭箬南岸曰上箬北岸曰下箬居人取下箬水釀酒醇美俗稱箬下酒劉夢得詩駱駝橋畔蘋風起鸚鵡杯中箬下春即此也荆溪在縣南六十里以其水出荆山因名之張玄之山墟名云昔漢荆王賈登山因以為名所謂荆南烏程荆溪之南耳若以為荊州則烏程去荊州三千餘里封

壤大不相接矣

茗溪漁隱叢話余以湖州圖經考之烏程縣以古有烏氏程氏居此能酒因此名焉其荆溪則在長興縣西南六十里此溪出荆山張協七命云酒則荆南烏程荆南則此荆溪之南也藝苑雌黃引長興縣南五十步箬溪水釀酒醇美稱箬下酒以為烏程酒及以夢得詩為證皆誤矣

酒譜房千里投荒錄云南方人有女數歲即大釀酒候

陂水竭寔壺其中密固其上候女將嫁決水取之供客
謂之女酒味絕美居常不可致也

宛委餘編名酒最古者關中之桑落水經注蒲坂劉白
墮所造成於桑落之候反語謂之索郎後史補云河中
桑落坊水所造也魏書汝南王元悅以桑落酒餉元乂
極其媚諛庾信索酒詩有蒲城桑落酒杜甫亦云坐開
桑落酒至張謂有不醉郎中桑落酒教人無奈別離何
酒譜皮日休詩云明朝有酒充君信播酒三餅寄夜航

播酒江外酒名亦見沈約文集

酒譜張籍詩云釀酒愛乾和即今人不入水酒也并汾間以為貴品名之曰乾酢音詐酒○留青日札云後周給

道遙公韋負河東酒即此

酒譜宋之問詩云尊湓宜城酒笙裁曲沃匏宜城在襄陽古之羅國也酒之名最古于今不廢唐人言酒之美者有郢之富水滎陽土窟富春石凍春劍南燒春河東乾和蒲東桃博嶺南靈溪博羅宜城九醞潯陽湓水京

城西市空蝦蟇陵其事見國史譜又有浮蟻榴花諸美酒雜見於傳記者甚衆

侯鯖錄幾頭酒山東風俗新沐訖飲酒謂之幾頭顏師古云字當為機音機機謂福祥也按禮云沐稷而饋梁髮晞用象櫛進機進羞工乃升歌鄭康成注云沐饋必進機作樂盈氣也此謂新沐饋體故更進飲食而作樂以自輔助致福祿也此古之遺法乎

名義考釋名酒有汎齊汎齊者若浮蟻在上汎汎然蓋

酒之美者其上有華其色綠斟則汎汎然浮於杯間也
集覽醲酒章懷太子曰醲猶濾也詩伐木篇醲酒有冀
注以筐曰醲以簋曰滑醲徐音所宜反葛洪音所寄反
謂以筐盜酒

丹鉛錄琬液瓊蘇皆古酒名見醉鄉日月

酒譜周官萍氏掌幾酒謂之萍古無其說按本草述水
萍之功云能勝酒萍之意其取於此乎

奚囊橘柚麋欽棗出真陵之山食一枚大醉經年不醒

東方朔嘗遊其地以一斛歸進上和諸香作丸大若芥子每集羣臣取一丸入水一石頃刻成酒味踰醇醪謂之麋酒又謂之真陵酒又謂之仙薌酒飲者香經月不散

續本事詩白樂天云羌管吹揚柳燕姬酌葡萄酒謂太原出葡萄酒也然此乃律詩用平聲讀則太不律用側聲讀則近俗耳

餘冬序錄老杜詩黃羊飫不羶蘆酒多還醉宋人解云

黃羊出關右塞上無角類麀鹿夷人所造酒荻管吸瓶
中故曰蘆酒也春按今陝西近蕃地皆有黃羊大如數
歲羝而角甚長西地羊角皆拳曲黃羊獨與江南同而
生順後其肉肥美膏黃厚而不羶川中人造酒荻管吸
瓶信然陝以西人則高盆貯糟飲時量多少注水盆中
竅盆吸之水盡酒乾謂之瑣力麻酒又曰雜麻酒即蘆
酒之遺制也宋人之所見者豈未詳耶

丹鉛錄杜詩黃羊飫不羶蘆酒多還醉蘆酒以蘆為筒

吸而飲之今之呷酒也又名釣藤酒酒以火成不醉不

筭兩缶西東以吸取

今云爐酒當是筆誤

演繁露今人謂公庫酒為兵厨酒言公庫之酒因犒軍而醞也太守正廳為設廳公厨為設厨皆以此也漢有步兵校尉掌上林苑屯兵晉阮籍聞步兵厨營人善釀有貯酒三百斛乃求為之則亦兵厨之祖也

酒譜王子年拾遺記張華為酒煮三薇以漬麴蘖出西羌麴出北胡以釀酒得美淳毫久含令人齒動若大醉

不搖蕩使人肝腸爛俗謂消腸酒或云酒可為長宵之樂兩說聲同而事異也

酒譜王莽以臘日獻椒酒於平帝其屠蘇之漸乎○今人元日飲屠蘇酒云可以除瘟氣亦曰藍尾酒或以年高最後飲之故有尾之義爾

一云屠割也蘇腐也

酒譜任昉嘗謂劉杳曰酒有千日當是虛言杳曰桂陽程鄉有千日酒飲之至家而醉亦其例昉大驚乃自出楊元鳳所撰置郡事檢之而信又嘗有人遺昉棖酒者

劉杳為辨其梔字之誤梔音陳木名其汁可以為酒

留青日札黃酒皇甫子奇以色如金而味醇且苦者名之曰酒賢張九齡詩玉盃纔傾黃蜜剖杜甫云鶯兒黃似酒又云對酒愛新鶯蘇軾云大杓瀉鶯黃

留青日札綠酒南岳夫人傳設王子喬瓊蘇綠酒李詩遙觀漢水鴨頭綠恰似葡萄初潑醅白樂天云傾如竹葉杯中綠秦少游云翡翠側身窺綠酒蘇子瞻云小舟浮鴨綠至楊廷秀乃云甌頭鴨綠變鶯黃

吳興掌故湖人好飲白酒暑中煮熟或入竹葉或荷葉
名為碧香清東坡有送碧香酒詩云碧香近出帝子家
鶯兒破殼酥流盎豈坡用此法為白酒破荒耶古人名
酒為白墮只白酒也

留青日札謝公樓一名紅泥酒在汀州張曲江詩謝公
樓上好醇酒二百青蚨買一斗罈用紅泥

留青日札霹靂耐暑月大雷時收雨水淘米炊飯釀酒
丑未觴南唐法用牛酥羊髓置醇酒中煖消而後飲

留青日札劉孝標云松子玉漿衛卿雲液蘇子謝送酒
詩揚州雲液却如酥又云花前白酒傾雲液

留青日札李太白好飲玉浮梁謂浮蛆酒脂也浦陽月

泉吟杜詩山歌聒耳烏鹽角村酒柔情玉練槌

今按此義烏陳

舜道詩也山歌聒耳今本作村聲盃耳村酒作社酒

說楷太白愛飲玉浮梁蓋浮蛆也山谷詩浮蛆翁翁動
春醅又梢頭紅糝杏花發甕面浮蛆酒齊消趙松雪詩
春酒帶蛆浮大白霜柑落手破輕紅余謂玉浮梁可對

金蠟面

留青日札黃庭堅詩浮蛆翁翁杯裏滑坐想康成輪泛
盜翁上聲酒成而翁翁然葱白色也

留青日札桐馬酒漢給大官以馬乳為酒采桐葉時乃
成李奇曰漢武有桐馬官作酒桐合作桐音動推引也
韋革為皮兜受數斗盛馬乳撞桐之

野客叢書都下有銀甕酒庫或問何謂僕考瑞應圖王
者宴不及醉則銀甕呈祥蓋取此意真州郡齋舊有酒

名謂之花露人亦莫曉僕讀姚合詩味輕花上露色似
洞中泉得非取此乎又太真妃宿酒初消吸花露以潤
肺見開元遺事

桐薪鄴渌湘東地名其水湛然綠色昔有釀家取以造
酒因名為鄴渌酒後人遂易其字為醪云按吳錄曰湘
東有鄴水酒西晉張載撰鄴酒賦長安春御樂浪夏設
未聞珍酒出于湘東左思撰吳都賦飛瓊觴而酌鄴醪
然漢人鄒陽于梁園席上賦酒便有渌鄴之目其來久

矣往年遇一方士傳授古鄴醪酒方以金鹽鼠蓂二味
為君採四季花陰乾和入其中蒸作飯糗以粉麴汲甘
泉釀之半月而成其色綠瑩殊凡不特芬香酷烈而已
花皆有名目惜未之試也

辨物志吳都賦云飛輕觴而酌醪淥李賀詩醪醕今夕
酒皆鄴淥並稱按衡陽縣東南有鄴湖取此水釀酒所
謂鄴酒豫章康樂縣有淥水烏程鄉酒官取水為酒味
亦甘美所謂淥酒也鄴淥本二而詩賦並舉者以豫章

舊屬荊州衡陽亦屬荆楚其產地同鄴淥歲獻其常貢
又同也然初名鄴淥後名醺醪何鄴淥言其地也地產
美酒後專以酒名故曰醺醪云

龍城錄魏左相證能治酒有名曰醺淥翠濤常以大金
甕內貯盛十年飲不歇其味即世所未有太宗文皇帝
嘗有詩賜公稱醺淥勝蘭生翠濤過玉薤千日醉不醒
十年味不敗蘭生即漢武百味甘酒也玉薤煬帝酒名
公此酒本學釀於西胡人豈非得大宛之法司馬遷所

謂富人藏萬石葡萄酒數十歲不敗者乎

天中記資暇集云黃中餘黨起西河白波谷漢既擒白
波戮之如卷席然故酒席倣之以快人情也青緇雜記
曰杯名文選飛觴舉白蓋卷白上之酒波耳薛瑩後漢
書曰黃中郭太等起于西河白波谷時謂之白波賊
聽雨紀談詩無酒酤我鄭康成訓沽為權沽之沽毛氏
注謂一宿酒曰沽蓋三代無沽酒者至漢武帝時方有
權沽似一宿酒為是

東坡詩話韓退之詩曰百年未滿不得死且可勤買拋
青春國史補云酒有郢之富春烏程之若下春滎陽之
土窟春富平之石凍春劔南之燒春杜子美亦云聞道
雲安麴米春纔傾一盞便醺人近世裴鉶作傳奇記裴
航事亦有酒名松醪春乃知唐人名酒多以春則拋青
春亦必酒名也

野客叢書東坡云唐人名酒多以春名退之詩勤買拋
青春國史補注滎陽土窟春富平石凍春劔南燒春子

美詩雲安麴米春僕觀鄭谷贈富平宰詩曰易博連宵
醉千缸石凍春知富平石凍春信矣觀白樂天詩有青
旗沽酒聽梨花之句注抗人其俗釀酒聽梨花時熟號
為梨花春是又有梨花春之名李白詩甕中百斛金陵
春劉夢得詩鸚鵡杯中若下春

閱耕餘錄唐人名酒以春義取詩之春酒如土窟春石
梁春婪尾春之類是也李白哭善釀紀叟詩云紀叟黃
泉裏還應釀老春

珊瑚鉤詩話酒有若下謂烏程也九醞謂宜城也十日
中山也蒲桃西涼也竹葉豫北也土窟春滎陽也石凍
春富平也燒春劍南也桑落陝右也烏孫國有青田核
莫知其木與實而核如五六斤瓢空之盛水俄而成酒
劉章曾得二馬集賓設之一核才盡一核又熟可供二
十客名曰青田壺歷城北有使君林魏正始中鄭公愷
三伏避暑于此取大蓮葉置硯格上盛酒三升以簪刺
同葉令酒與柄通屈莖吸之薌氣清冽名曰碧筍酒予

詩曰釀憶青田核觴宜碧藕箇直須千日醉莫放一杯
空近時以黃柑醞酒號洞庭春色以糯米藥麴作白醪
號玉友皆奇絕者耳

韻語陽秋酒之種類多矣有以綠為貴者白樂天所謂
傾如竹葉盈尊綠是也有以黃為貴者老杜所謂鴛兒
黃似酒是也有以白為貴者樂天所謂玉液黃金卮是
也有以碧為貴者老杜所謂重碧酤新酒是也有以紅
為貴者李賀所謂小槽酒滴珍珠紅是也今閩廣間所

釀酒謂之紅酒其色殆類胭脂酉陽雜俎載賈璿家蒼

頭能別水常乘小艇於黃河中以瓠音薄小瓢也接河源

水以釀酒經宿色如絳名為崑崙觴是又紅酒之尤也
錦里新聞邛人剗大竹傾春釀于中號邛筒酒川中至
今以占米或黍七分高粱三分以五加尖釀之

集覽魏主賜崔浩御縹醪千觔縹匹沼反醪汁滓酒也
杜甫詩重碧拈春酒注引曹子建七啟云春酒縹酒注
縹深碧色縹當作醪酒清者曰醪左思蜀都賦觴以醪

清一醉累月

霏雪錄松葉可釀酒唐人詩云松葉堪為酒春來釀幾多是也松花亦可釀王建寄獨孤少府云自看和釀一依方緣著松花色較黃是也

黃常明曰砮溪人以藤代菊酒名鈎藤俗傳他處即不可用或謂但醞造之法異耳所在皆可樂天詩云閒拈舊葉題新詠悶取藤枝引酒嘗是巴蜀亦有之

碧湖雜記杜詩云坐開桑落酒來把菊花枝按齊民要

術造酒門有桑落酒神麴酒其名不一又云桑欲落時造黍米酒可得永年造神麴酒春秋二時造者皆得過夏然桑落時作者乃勝于春天有造桑落酒麴法老杜或本諸此所謂桑落酒者恐未必然

留青日札桑落河中坊井名桑落時取其水釀酒庾信

詩蒲城桑落酒或以為桑郎又訛為索郎又曰羌中桑

落河馬乳酒

湘州錄瑯琊記試鶯家多美釀試鶯不善飲時為宋遷索取試鶯恒曰此宜為某設

哉抵當索與郎耳因名酒曰索郎後人謂索郎為桑落反音亦偶合也恐非本指

代醉編劉白墮善釀酒熟於桑落之辰因名桑落酒或曰以桑落河名之也後人乃訛為索郎王子年拾遺記云武帝思李夫人不止從者乃進洪梁之酒酌以文螺之卮卮出波祗之國酒出洪梁之縣今言雲陽出美酒兩聲相亂矣

集覽桑落酒齊民要術曰桑落酒法用九月九日作水麴米皆以三斗為準案庾信就蒲州刺史乞酒詩云蒲城桑落酒霸岸菊花秋願持河朔飲分勸東陵侯則桑

落酒出蒲中也又水經蒲阪下注郡民有劉白墮工釀
採挹河流醞成芳酎熟於桑落之辰故酒因名焉王公
庶人牽拂相招者每云索郎有願思同侶之語蓋索郎
反語桑落耳鄭印曰西羌桑落河出焉乳酒羌人兼葡
萄壓之晉宣帝時嘗來獻故九日賜百寮飲焉

彈雅桑落索郎並是名酒一是酒法一是方言以其南
北轉渾強合一名耳因戲題云桑落攜名酒行人喚索
郎何如擠一醉顛倒著衣裳

余氏辨林魏書王悅以桑落酒飲元乂世說庾信詩蒲城桑落酒杜甫詩坐開桑落酒張謂詩不醉郎中桑落酒有解云廬山有桑落洲故酒因地而名猶若下巴清宜城中山之類及按水經注云蒲坂劉白墮醞釀排於桑落之辰續古今注亦云酒美於桑落之時齊民要術亦云釀桑落酒亦以九月史補亦云河中桑落坊有井每至桑落時取其水以釀酒則知桑落以時而名之也六研齋筆桑寄生與蠶沙入酒極佳原酒之始實本於

桑按晉江統作酒誥曰酒之所興肇自上皇或云儀狄
一曰杜康有飯不盡委餘空桑鬱積生味久蓄氣芳本
出於此不繇竒方朱翼中著北山酒經三卷曰古語有之空
桑穢飯醞以稷麥以成醇醪酒之始也烏梅女麴醅九投
澄清百品酒之終也又道書載中國極東瀕海有扶桑樹大
數千里掩蔽日月每旦日從東南出地上經過此樹謂之扶
桑洲樹汁淪液入地其土極美產百穀蔬菜皆桑之精
髓所化也古仙人留大丹訣刊函谷關石上有云采於

蠶食之先煉於火化之後蓋以桑為丹基耳凡桑上生

草與桑堪皆為上藥

斃音桓

嬾真子蘇秀道中有地名五木出佳酒故人以五木名之然白樂天為杭州太守日有詩序云錢湖州以茗下酒李蘇州以五醖酒相次寄到詩云勞將茗下忘憂物寄與江城愛酒翁鐺脚三州何處會甕頭一盞幾時同傾如竹葉盈樽綠飲作桃花上面紅莫怪慙慙最相憶曾陪西省與南宮僕嘗以此問於僕之七舅氏云醖

字與殺同意乃今之羊羔兒酒也詳其詩意當以五羔
為之以是酒名故從酉云樂天詩云竹葉盈樽綠謂若
下酒取竹有綠之意也桃花上面紅謂五醖酒取桃花
五葉也後人不知轉其名為五木蓋失之矣僕檢韻中
醖字乃實同音注云重釀酒也恐醖難轉而為木

梁谿漫志叙州本戎州也老杜戎州詩云重碧傾春酒
輕紅擘荔枝今叙州公醖遂名以重碧東坡在齊安有
春江綠漲蒲萄醅之句靖康初元韓子蒼舍人駒作守

有旨添賜郡釀因名其庫曰蒲萄醅仍有詩云孤臣政術不堪論尚得君王賜酒尊父老異時傳盛事蒲萄醅熟記初元

對問編嘗觀魏文詔羣臣葡萄中國珍果釀以為酒甘於麴蘖則種雖得之漢武釀法實自魏文始唐史太宗破高昌收馬乳葡萄種之苑中并得其法損盆成酒京師始識其味據史氏乃言唐初得之何耶傳至中葉劉禹錫歌釀之成美酒令人飲不足此法歷唐不衰矣草

水子記葡萄酒始於元乃答刺古為之又何耶何子元
引張華博物志云西域有之至魏時中國尚未有也又
引金人元好問載劉光甫言安邑多葡萄人不知其釀
法豈其法良且艱肇造於魏而六朝失之中興於唐而
五季失之至元答刺古復作與因考異域釀法高麗以
杭火琉球則婦人嚼米為之猶然粒食也若蘇祿以蔗
彭亨占城爪哇以棚淳泥亦用之間有秫耳去葡萄不
遠何子元謂梨橘皆可釀信有之

避暑錄話洛陽伽藍記載河東人劉白墮善釀酒雖盛暑曝之日中經旬不壞今玉友之佳者亦如是也吾在蔡州每歲夏以其法造寄京師親舊陸走七程不少變又嘗以餉范德孺於許昌德孺愛之藏其一壺忘飲明年夏復見發視如新者白墮酒當時謂之鶴觴謂其可千里遺人如鶴一飛千里或曰騎驢酒當是以驢載之而行也白墮乃人名子瞻詩云獨看紅蕖傾白墮恐難便作酒用吳下有饌薦設客用王逸少事言請食右軍

傳以為戲傾白墮得無與食右軍為偶耶

按如藍記毛洪賓齋酒之

蕃路逢盜劫之皆醉因執之乃名擒姦酒

野客叢書宋子京曰古人語有推拙不可掩者樂府曰

何以銷憂惟有杜康僕觀東晉賦杜康啞其胃樂天詩

杜康能解悶潘佑詩直擬將心付杜康蓋祖此意文士

有因其人名遂為事用者如東坡詩獨對紅蕖傾白墮

按洛陽伽藍記白墮春醪自是造酒者河東人姓劉名

白墮或謂因其能造酒遂為酒名又近時稱主簿為仇

香似此之類甚多其與湯燂石軍醋浸曹公之說何異
疑耀五嶺之外絕無佳醞近遊宦者宴會皆嗜蒼梧寄
生酒獨其性酷熱不宜多飲蒼梧之酒自古有之晉張
華輕薄篇有蒼梧竹葉青陳張正見置酒高臺上詩浮
蟻擅蒼梧未審即此寄生酒否

疑耀蘭溪河清酒自宋元已有名第其時已有甘滯不
快之訾見范成大驂鸞錄矣

續本事詩前輩戲云有西湖風月不如東洛軟紅香塵

之語故東坡和錢穆公蔣穎叔從駕景雲宮詩云半白
不嗟垂項髮軟紅猶戀屬車塵

桐新道藏經有金飯玉漿之文故唐李商隱詩璫漿未
飲結成冰然則淮南屑玉化水之法信非妄矣

五雜俎唐肅宗張皇后以鴆

音運

腦酒進帝欲其健忘也

順宗時處士伊初玄入宮飲龍膏酒令人神爽也此二

者正相反酉陽雜俎鵲生三子一為鵲

音痴

即鵲寄

五雜俎紅灰酒品之極惡者也而坡以紅友勝黃封甜

酒味之最下者也而杜謂不放香醪如蜜甜

學齋帖嗶陸放翁筆記有云唐人愛飲甜酒灰酒如杜
子美詩不放春醪如蜜甜則引證切矣如灰酒又引陸龜
蒙酒滴灰香似去年一句為證余又哂其不然蓋龜蒙
初冬絕句末聯云小爐低幌還遮掩酒滴灰香似去年
言初冬圍爐飲酒盞瀝滴在灰中而香仍似去年光景
不是酒似灰香耳以上句觀之其義昭然此精於詩而
不善觀詩如此何哉

野客叢書三山老人云唐人好飲甜酒殆不可曉予美
曰人生幾何春與夏不放香醪如蜜甜退之曰一尊春
酒甘若飴丈人此樂無人知僕謂唐人以酒比飴蜜者
大率謂醇乎醇者耳非謂好飲甜酒也且以樂天詩驗
之曰甕頭竹葉經春熟如飴氣味綠黏臺曰春攜酒客
過綠飴黏盞杓曰宜城酒似飴曰黏臺酒似飴樂天詩
非不言酒之甜也至要其極論則曰甘露太甜非正味
醴泉雖潔不芳馨曰戶大嫌甜酒才高笑小詩曰甕揭

聞時香酷烈餅封貯後味甘辛酒味至於甘辛乃為佳耳樂天之詩又如此豈好甜酒哉且退之詩亦自有酒味冷冽之語又豈嘗專好甜酒邪然樂天戶大嫌甜酒之句正屬退之非好甜酒矣大抵酒味之適口古今所同豈唐人所好與今異邪三山蓋不深考耳予美香醪如蜜甜之句與巴子歌同巴子歌曰香醪甜似蜜峽魚美可鱸

墨莊漫錄僧謂酒為般若湯鮮有知其說者予偶讀釋

氏會要乃得其說云有一客僧長慶中屆一寺呼淨人
酤酒寺僧見之怒其麁暴奪餅擊栢樹其餅百碎其酒
凝滯著樹如綠玉搖之不散僧曰某常持般若經須傾
此物一盃即諷詠劉亮乃將餅就樹盛之其酒盡落器
中畧無寸遺奄然流啜斯須器音庾酣暢矣酒之度辭
其起此乎

酒譜天竺國謂酒為酥今北僧多云般若湯蓋庾辭以
避法禁爾非釋典所出○閱耕餘錄曰蓋當時猶知有

僧律也

藝林彙考飲食篇卷六

欽定四庫全書

藝林彙考飲食篇卷七

蓬萊縣知縣沈自南撰

茶茗類

雲谷雜記飲茶不知起於何時歐陽公集古錄跋於茶之見前史蓋自魏晉以來有之予案晏子春秋嬰相齊景公時食脫粟之飯炙三戈五卯茗菜而已又漢王褒僮約有五陽一作武都買茶之語則魏晉之前已有之矣但

欽定四庫全書

卷七

當時雖知飲茶未若後世之盛也郭璞注爾雅云樹似
梔子冬生葉可煮作羹飲然茶至冬味苦豈復可作羹
飲邪飲之令人少睡張華得之以為異聞遂載之博物
志非但飲茶者鮮識茶者亦鮮至唐陸羽著茶經三篇
言茶者甚備天下益知飲茶其後尚茶成風回紇入朝
始驅馬市茶德宗建中間趙贊始興茶稅興元初雖詔
罷貞元九年張滂復奏請歲得緡錢四十萬今乃與鹽
酒同佐國用所入不知幾倍於唐矣

說畧古人以飲茶始於三國時按趙飛燕別傳成帝崩後后一夕寢中驚啼甚久侍者呼問方覺乃言曰吾夢中見帝帝賜吾坐命進茶左右奏帝云向者侍帝不謹不合啜此茶云云然則西漢時已嘗有啜茶之說矣

疑耀古人冬則飲湯夏則飲水未有茶也資暇錄謂茶始於唐崔寧黃伯思已辨其非伯思嘗見北齊楊子華作邢子才魏收勘書圖已有煎茶者南牕紀談謂飲茶始於梁天監中事見洛陽伽藍記及閱吳志韋曜傳賜

茶薺以當酒則茶又非始於梁矣余謂飲茶亦非始於吳也爾雅曰攢苦茶郭璞注可以為羹飲早米為茶晚采為茗一名薺則吳之前亦以茶作飲矣第未必如後世之日用不離也蓋自陸羽出茶之法始講自呂惠卿蔡君謨輩法始精而茶之利國家且藉之矣此古人所不及詳者也

燕閒錄茶之用始於漢著茶經始於陸羽種茶始於張滂爾雅攢苦茶茶之名始見於此吳志孫皓密賜韋曜

茶茗以當酒飲茶始見於此

宛委餘編古傳注茶樹初採為茶老則為茗今人俱稱
新茗當是錯用事也王肅在宋嗜茗後走魏嗜酪曰茗
不中與酪作奴北人因呼茗為酪奴

余氏辨林郭璞云蚤取為茶晚取為薺茶經云一曰茶
二曰攢三曰設音設四曰茗五曰薺齊王肅曰茶不如酪

號為酪奴按五經古史並無茶字故今篆書通作茶

漁隱叢話詩云誰謂茶苦爾雅云攢苦茶注樹似梔子

今呼早采者為茶晚采者為茗一名薺蜀人名苦茶故
東坡乞茶栽詩云周詩記苦茶茗飲出近世初緣厭梁
肉假此雪昏滯蓋謂是也六一居士嘗新茶詩云泉甘
器潔天色好坐中揀擇客亦佳東坡守維陽於石壩寺
試茶詩云禪窓麗午景蜀井出冰雪坐客皆可人鼎器
手自潔正謂諺云三不點也

名義考嘗考茶即荼也說文茶从艸余聲有二音一鉏
加切一同都切有四義一苦茗霜後可食詩誰謂荼苦

是也一委葉布地而生黃花如菊傳秦網密於秋茶是也三茆秀其穗色白詩有女如荼是也四苦茶茗也爾雅攢苦茶郭璞曰樹如梔子冬生葉可煮為羹飲本草苦茶能去脂使人不睡是也後人視苦苴委葉茆秀為惡草作茶作同都切視茗為嘉木妄作茶作鉏加切於是其有茶字又有茶字不知茶非正文也陸羽茶經曰其字或從艸或从木或艸木并从艸者茶正文也艸木并者旁从木作茶也巴南人曰撮茶俗以上从艸下从木

作茶亦曰木并不知下余聲非从木也

升鉛錄茶即古荼字也周詩記荼苦春秋書齊荼漢志書茶陵顏師古陸德明雖已轉入茶音而未易字文也至陸羽茶經玉川茶歌趙贊茶禁以後遂以茶易茶

對問編草木子茶之用始於唐蓋據陸羽經耳晉史劉琨求真茶於弟北魏呼茗為酪奴則先唐人用之三國韋曜傳孫皓賜茶茗以當酒又先晉魏用之續停驂錄茶之名見於王褒僮約褒西漢人又先三國用之爾雅

釋木槩苦茶景純注早茶晚茗爾雅創自周公即郭注
不誣則成周時已用之豈俟西漢耶抑予尤不能了僮
約烹茶買茶文苑注茶苦菜茶茗也二物明矣楊用修
謂茶即古荼字周詩荼苦春秋齊君荼漢地理志茶陵
顏師古陸德明雖轉入茶音未易字文陸羽輩方易之
其說始之羅鄂州二家則指為一物也及用修辨苦菜
乃引周詩及本草爾雅顏氏家訓諸書以茶當之即游
冬花則茶茶非一明甚不識用修何先後岐也洪武正

韻合茶茶為一音宣考之顏陸與及以茗釋茶以苦菜
釋茶折而為二又合文苑注矣商書夏王荼毒蔡傳以
茶苦釋之此苦菜耶抑苦茶耶如苦茶也夏商之世已
用之矣嘗笑民生切用稼穡而外無如茶尚莫究所始
矧庶彙之衆耶

訥譚誰謂荼苦其甘如薺言味中有味也亦青子餘甜
之意此品茶之最先者以薺菲下體觀之是其例矣陸
季疵茶經引神農爾雅下逮方書然不若此詩風旨本

草注又引堇茶如飴尤見故實天隨子有十咏亦緣陸
而作

六研齋筆攝山棲霞寺有茶坪茶生藜莽中非經人剪
植者唐陸羽入山采之皇甫冉作詩送之云采茶非采
萊遠遠上層崖布葉春風暖盈筐白日斜舊知山寺路
時宿野人家借問王孫草何時汎挽花茶事於唐末未
甚興人知鴻漸到處品泉不知亦到處搜茶

說畧南部新書云湖洲造茶最多謂之顧渚貢焙歲造

一萬八千餘斤按此則唐茶不重建以建未有奇產也至南唐初造研膏繼造蠟面既又佳者號曰京挺宋初置龍鳳模號石乳又有的乳白乳而蠟面始下矣丁晉公進龍鳳團至蔡君謨又進小龍團神宗時復製密雲龍哲宗改為瑞雲翔龍則益精而小龍團下矣徽宗品茶以白茶第一又製三色細芽而瑞雲翔龍下矣宣和庚子漕臣鄭可聞始創為銀絲冰芽蓋將已揀熟芽再剔去祇取其心一縷用清泉漬之光瑩如銀絲方寸新

勝小龍蜿蜒其上號龍團勝雪去龍腦諸香遂為諸茶之冠今建茶碾造雖精不去龍腦以為奩閣中味亦不用入瀾而茶品獨貴者虎丘其次天池又其次陽羨之佳者岵而龍井六安之類皆下矣

畫墁錄有唐茶品以易羨為上供建溪北苑未著也貞元中常袞為建州刺史始蒸焙而研之謂研膏茶其後稍為餅樣故謂之一串陸羽所烹惟是草茗爾迨至本朝建溪獨盛採焙製作前世所未有也士大夫珍尚鑒

別亦過古先丁晉公為福建轉運使始製為鳳團後又為龍團貢不過四十餅專擬上供雖近臣之家徒聞之而未嘗見也天聖中又為小團其品迴加於大團賜兩府止於一觔唯上大齊宿八人兩府共賜小團一餅縷之以金八人折歸以侈非常之賜親知瞻玩賡唱以詩故歐陽永叔有龍茶小錄或以大團問者輒封方寸以供佛供仙家廟已而奉親并待客享子弟之用熙寧末神宗有旨建州製密雲龍其品又加於小團矣然密雲

之出則二團少粗以不能兩好也

演繁露建茶名蠟茶為其乳泛湯面與鎔蠟相似故名蠟面茶也揚文公談苑曰江左方有蠟面之號是也今人多書蠟為臘云取先春為義失其本矣

漁隱叢話歐公和劉原父揚州時會堂絕句云積雪猶封蒙頂樹驚雷未發建溪春中州地暖萌芽早入貢宜先百物新注云時會堂造貢茶所也余以陸羽茶經考之不言揚州出茶惟毛文錫茶譜云揚州禪智寺隋之

故宮寺枕蜀岡其茶甘香味如蒙頂焉第不知入貢之因起於何時故不得而誌之也

漁隱叢話唐茶惟湖州紫筍入貢每歲以清明日貢到先薦宗廟然後分賜近臣紫筍生顧渚在湖常二境之間當採茶時兩郡守畢至最為盛集此蔡寬夫詩話之言也蔡但知其一而不知其二按陸羽茶經云浙西以湖州上常州次湖州生長興縣顧渚山中常州義興縣生若山懸腳嶺北峰下唐義興縣重修茶舍記云義興

貢茶非舊也前此故御史大夫李栖筠實典是邦山僧
有獻佳茗者會客嘗之野人陸羽以為芬香甘辣冠于
他境可薦於上栖筠從之始進萬兩此其濫觴也厥後
因之徵獻浸廣遂為任土之貢與常賦之邦侔矣故玉
川子詩云天子未嘗陽羨茶百草不敢先開花正謂是
也當時顧渚義興皆貢茶又鄰壤相接白樂天守姑蘇
聞賈常州崔湖州茶山境會想羨歡宴因寄詩云遙聞
境會茶山夜珠翠歌鐘俱遶身盤下中分兩州界燈前

合作一家春青娥遞舞應爭妙紫筍齊嘗各鬪新自歎
花時北窓下蒲黃酒對病眠人唐袁高為湖州刺史因
修貢顧渚茶山作詩云禹貢通遠俗始圖在安人後生
失其本職吏不敢陳亦有姦佞者因茲欲求伸動至千
金費日使萬姓負我來顧渚源得與茶事親黎甿輟耕
農采掇實苦辛一夫且當役盡室皆同臻捫葛上敲壁
蓬頭入荒榛終朝不盈掬手足皆鱗皴悲嗟遍空山州
水為不春陰嶺牙未吐使曹牒已頻心爭造化先走挺

麋鹿均選納無日夜擣聲昏繫晨衆功何枯櫨俯視彌
傷神皇帝尚巡狩東郊路多堙周回繞天涯所獻惟艱
勤況減兵革用兼茲困疲民未知供御餘誰合分此珍
顧省忝邦守有慙復因循茫茫滄海間丹憤何由申此
詩雅得詩人諷諫之體可尚也

韻語陽秋世言團茶始於丁晉公前此未有也慶歷中
蔡君謨為福建漕使更製小團以充歲貢元豐初下建
州又製密雲龍以獻其品高於小團而其製益精矣曾

文昭所謂莆陽學士蓬萊仙製成月團飛上天又云密雲新樣尤可喜名出元豐聖天子是也唐陸羽茶經於建茶尚云未詳而當時獨貴陽羨茶歲貢特盛茶山居湖常二州之間修貢則兩守相會山椒有境會亭基尚存盧仝謝孟諫議茶詩云天子未嘗陽羨茶百草不敢先開花是已然又云開緘宛見諫議面手閱月團三百片則團茶已見於此當時李郢茶山貢焙歌云蒸之馥之香勝梅研膏架動聲如雷茶成拜表貢天子萬人爭

嗽春山摧觀研膏之制則知嘗為團茶無疑自建茶入貢陽羨不復研膏矣

六研齋筆杜鴻漸與楊祭酒書云顧渚中山紫筍茶兩片此物但恨帝未得嘗實所太息一片上太夫人一片充昆弟同啜然則唐所進奉類非佳味其後開成三年以貢不如法停刺史裴充官

夢溪筆譚建茶之美者號北苑茶今建州鳳凰山土人相傳謂之北苑言江南嘗置官領之謂之北苑使予因

讀李後主文集有北苑詩及文苑紀知北苑乃江南禁苑在金陵非建安也江南北苑使正如今之內園使李氏時有北苑使善製茶人競貴之謂之北苑茶如今茶器中有學士甌之類皆因人得名

楊公筆錄會稽日鑄山茶品冠江浙山去縣幾百里有上竈下竈蓋越王鑄劍之地世傳越王鑄劍他處皆不成至此一日而鑄成故謂之日鑄或云日注非也山有寺其泉甘美尤宜茶山頂謂之油車嶺茶尤奇所收絕

少其真者牙長寸餘自有麝氣越人或以沸湯沃麝乘
熱滌瓶焙乾以貯茶牙密封之偽稱日鑄開瓶麝氣襲
人殊混真人往往不能辨或云日注以日所注處云

七修類藁世以山東蒙陰縣山所生石鮮謂之蒙茶士
大夫珍貴而茶經所不載蒙頂茶在四川雅州即古蒙
山郡其圖經云蒙頂有茶受陽氣之全故茶芳香方輿
勝覽一統志土產俱載蒙頂茶晁氏客話亦言雅州也
演繁露盧仝謝惠茶詩歷叙一盃至六盃皆有功用其

誇茶力至曰既覺兩腋習習清風生蓬萊山在何處玉
川子乘此欲歸去案溫庭筠採茶錄天台記丹丘出大
茶服之生羽翼又茶譜記蒙山中頂茶效曰若獲四兩
服其一則祛疾二即無病三即換骨四兩即為地仙有
僧信其言僅獲一兩服之病差容貌若三十許人眉髮
綠色然則謂茶能輕身可為飛仙非全出意為怪奇也
餘冬序錄郴之桂陽縣產風葉克茗飲能愈頭風故名
亦可浸酒性微熱前人志記不載范石湖集蠻茶出修

江治頭風南人今無所謂蠻茶者風葉豈蠻茶之謂耶
擲之土蛹石湖所謂地蠶是也地蠶中州亦有之謂之
甘露子

丹鉛錄竹坡詩話曰東坡有密雲龍山谷有喬雲龍皆
茶名也

五色線龍安有騎火茶最上不在火前不在火後故也
清明改火故曰騎火茶

丹鉛錄蔡襄茶錄佳茶多以珍膏油其面自注油去聲

丹鉛錄凡茶有二類曰片曰散片茶蒸造實捲摸中串之惟建劍則既蒸而研編竹為格置焙室中最為精潔他處不能造其名有龍鳳石乳的乳白乳頭金蠟面頭骨次骨末骨麕骨山挺十二等以充歲貢及邦國之用洎本路食茶餘州片茶有進寶雙勝寶山兩府出興國軍仙芝嫩蕊福合祿合運合慶合指合出饒池州泥片出虔州綠英金片出袁州玉津出臨江軍靈川福州先春早春華英來泉勝金出歙州獨行靈草綠芽片金金

茗出潭州大拓枕出江陵開勝開捲小捲生黃翎毛出
岳州雙上綠芽大小方出岳辰澧州東首淺山薄側出
光州總二十六名其兩浙及宣江鼎州止以上中下或
第一至第五為號散茶有太湖龍溪次號末號出淮南
岳麓草子楊樹雨前雨後出荊湖清口出歸州茗子出
江南總十一名又小峴山在六安州出茶名小峴春即
六安茶也

按此一則出通考
升菴特錄之耳

五雜俎文獻通考茗有片有散片者即龍團舊法散者

則不蒸而乾之如今之茶也始知南渡之後茶漸以不蒸為貴矣

臆乘茶之所產陸經載之詳矣獨異美之名未備謝氏論茶曰比丹丘之仙茶勝烏程之御荈不止味同露液白況霜華豈可為酪蒼頭便應代酒從事揚行之作洛陽伽藍記日食有酪奴指茶為酪粥之奴也杜牧之詩山實東南秀茶稱瑞草魁皮日休詩石盆煎臯盧曹鄴詩劍外尤華美施肩吾詩茶為滌煩子酒為忘憂君胡

嶠詩沾牙舊姓餘甘氏破睡當封不夜侯陶彞詩生涼
好喚蘇雞佛回味宜稱橄欖仙皮光業詩未見甘心氏
先迎苦口師清異錄名森伯又名晚甘侯

庶物異名疏執林伐山云碧琳腴酒名見曾吉父詩仁
按山谷詩喜公新賜紫琳腴真誥詩漱此紫琳腴則又
茶名

留青日札古人酒多以春名而茶亦有以春名者宣和
之玉液長春龍苑報春萬春銀葉我朝建寧貢茶曰探

春曰先春曰次春又宋謝府酒名勝茶此又奇也余欲以茶名勝酒

留青日札熊克北苑別錄載茶之品有曰小芽者其小如鷹爪先次蒸熟置之水盆中剔取其精英僅如針小謂之水芽是小芽中之最精者曰中芽者即一鎗二旗也曰紫芽者葉之紫者也曰白合者乃小芽有兩葉抱而生者也曰烏蒂者茶之帶頭者也水牙為上小芽次之中芽又次之紫芽白合烏蒂皆所不取

夢溪筆談茶芽古謂之雀舌麥顆取其至嫩也余謂茶之美者其質素良而所植之土又美則新芽一發便長寸餘其細如針惟芽長為上品以其質幹土力皆有餘也如雀舌麥顆皆下材耳乃北人不識誤為品題予山居有茶崙為詩曰誰把嫩香名雀舌定知北客未曾嘗不知靈草天然異一夜風吹一寸長

七修類藁世傳烹茶有一橫一豎而細嫩於湯中者謂之旗鎗茶麈史謂茶之始生而嫩者為一鎗浸大而展

為一旗過此則不堪矣葉清臣煮茶述曰粉鎗末旗蓋以初生如針而有白毫故曰粉鎗後大則如旗矣此與世傳之說不同不知歐陽公新茶詩曰鄙哉穀雨鎗與旗王荊公又曰新茗齋中試一旗則似不取也或者二公以雀舌為旗鎗耳世不知雀舌乃茶之下品今人認作旗鎗非是故昔人有詩云誰把嫩香名雀舌定應北客未曾嘗不知靈草天然異一夜春風一寸長或二公又有別論亦未可知姑記之

研北雜志李仲賓學士言交趾茶如綠苔味辛烈名之曰登

丹鉛錄傳巽七誨垣陽黃梨巫山朱橘南中茶子西極石蜜茶子觸處有之而永昌產者味佳乃知古人已入文字品題矣

丹鉛錄蔡松年小詞銀屏小語私分麝月春心一點麝月茶名麝言香月言圓也或說麝月是畫眉香煤亦通但下不得分字又中州樂府載党懷英茶詞云紅莎綠

弱春風餅趁梅驛來雲嶺金國明昌大定時文物已埒
中國而製茶之精如此金人風味可補北苑貢茶錄
之缺

五雜俎古人造茶多春今細末而蒸之唐詩家僮隔竹
敲茶臼是也至宋始用碾揉而焙之則自本朝始也但
揉者恐不若細末之耐藏耳

五雜俎蘇才翁與蔡君謨鬪茶蔡用惠山泉水蘇茶稍
劣改用竹瀝水煎遂能取勝然竹瀝水豈能勝惠泉乎

竹瀝水出天台云彼人將竹少屈而取之盈瓮則竹露非竹瀝也若醫家火逼取瀝斷不宜茶矣

五雜俎昔人喜鬪茶故稱茗戰錢氏子弟取雪上瓜各言子之的數剖之以觀勝負謂之瓜戰然茗猶堪戰瓜則俗矣

陳輔之詩話唐趙璘述因話錄載其家兵部君性尤嗜茶能自煎謂人曰茶須緩火炙活水煎坡有活水還須緩火煎恐亦用此

東坡詩詒唐人煎茶用薑故薛能詩云鹽損添常戒薑
宜著更誇據此則又有用鹽者矣近世有用此二物者
輒大笑之然茶之中等者用薑煎信佳也鹽則不可

疑耀東坡和寄茶詩老妻稚子不知愛一半已入薑鹽
煎陳無已乞茶詩愧無一縷破雙團慣下鹽薑枉肺肝
是唐宋以前茶皆用薑鹽也有友人嘗為余言楚之長
沙諸郡今茶猶用鹽薑乃為敬客豈亦古之遺俗耶

漁隱叢話文昌雜錄云庫部林郎中說建州上春採茶

時茶園人無數擊鼓聲聞數里然一園中才間壟茶品
已相遠又況山園之異耶歐陽永叔嘗茶詩云年窮臘
盡春欲動蟄雷未起驅龍蛇夜聞擊鼓滿山谷千人助
叫聲喊呀萬木寒凝睡不穩惟有此樹先萌芽予官富
沙凡三春備見北苑造茶但其地暖方驚蟄茶芽已長
寸許初無擊鼓喊山之事永叔詩與文昌所紀皆非也
北苑茶山凡四十五里茶味惟均豈有間壟茶品已相
遠之說耶

青瑣集范文正有採茶歌天下共傳蔡君謨謂希文公
歌膾炙人口有少未完蓋公才氣豪傑失於少思希文
曰何以言之君謨曰昔公句云黃金碾畔綠塵飛碧玉
中翠濤起今茶之絕品其色貴白翠綠乃茶之下者耳
希文曰君善鑒茶者也此中吾語之病也公意如何君
謨曰欲革公詩二字非敢有加焉公曰革何字君謨曰
翠綠二字可云黃金碾畔玉塵飛碧玉甌中素濤起希
文曰善又見君謨之精茶希文之伏於義

三山老人語錄茶之佳品造在社前其次則火前謂寒食前也其下則雨前謂穀雨前也佳品其色白若碧綠者乃常品也茶之佳品牙蘄細微不可多得若此數多者皆常品也茶之佳品皆點啜之其煎啜之者皆常品也齊己茶詩曰甘傳天下口貴占火前名又曰高人愛惜藏巖裏白甌封題寄火前丁謂茶詩曰開緘新試火須汲遠山前凡此皆言火前蓋未知社前之品為佳也鄭谷茶詩曰入座半甌輕泛綠開緘數片淺含香鄭雲

叟茶詩曰維憂碧粉散嘗見綠花生沈存中論茶謂黃金碾畔綠塵飛碧玉甌中翠濤起宜改綠為玉翠為素此論可也而舉一夜風吹一寸長之句以為茶之精美不必以雀舌鳥觜為貴今案茶至於寸長則其芽葉大矣非佳品也存中此論曲矣盧仝茶詩曰開緘宛見諫議面手閱月團三百片薛能謝劉相公寄茶詩曰兩串春團敵夜光名題天柱印維揚茶之佳品珍逾金玉未易多得而以三百片惠盧仝以兩串寄薛能者皆下品可知

也齊已詩角開香滿室爐動綠凝鐺丁謂詩曰末細烹
還好鐺新味更全此皆煎啜之也煎啜之者非佳品矣
唐人於茶雖有陸羽為之說而評論未精至本朝蔡君
謨茶錄既行則持論精矣以茶錄而覈前賢之詩皆未
知佳味者也

漁隱叢話東坡詩春濃睡足午窓曉想見新茶如潑浮
又云新火發茶乳此論皆得茶之正色矣至贈謙師點
茶則云忽驚午盞兔毫斑打作春甕鶯兒酒盖用老杜

詩鴛兒黃似酒對酒愛新鴛若是則其色黃烏得為佳
茗哉今東坡前集不載此詩想自知非故刪去之



藝林彙考飲食篇卷七